

# Txirritola

ARAMAIO / Eguena / 2006ko urtarrilaren 20a / 178. zenbakia

KOORDINATZAILEA: Ubane Madera • Otalora Lizentziaduna 31 20500 ARRASATE • Tel.: 943 71 25 11 • Faxa: 943 71 23 89 • Posta elektronikoa: txirritola@goiena.com • Lege gordailua: SS.1084/02

## Udalak eta lurjabeek, biek hala biek aurkeztu dizkiote alegazioak AHTri

UBANE MADERA

50 bat lagun elkartu ziren joan den barikuan Aramaion, Abiadura Handiko Trenari alegazioak aurkezteko. Aramaio Udalak ere aurkeztu dizkio. Oro har, informazioa falta zaiela alegatu dute. Datorren martitzenean etorriko dira okupazio aktak jasotzera.

40 lagunek baino gehiagok sinatu zituzten alegazioak; AHT egiteko desjabetu beharreko lursailak direla eta egin dituzte alegazioak. Hain zuzen ere, Eskoriatza eta Arrasate artean trenaren ibilbidea erakitzeke zundaketak egin behar dituzte eta horiek egiteko desjabetu behar dituzte zenbait lursail; alegia, orain dela hiru urte baimena eman ez zuten lursailetan egin behar dituzte zundaketa horiek, gero trena eraiki ahal izateko.

Eta lursail horien okupazio aktak urtarrilaren 24an jasoko dituzte; datorren martitzenean, hain justu ere.

### EZ SINATZEKO ASMOA

Madrilgo Sustapen Ministerioak hitzordua egin du lursail horien jabeekin martitzenerako (zortzi jabe dira Aramaioak). Hitzordua Udaleko osoko bilkuren aretoan da, goizez zein arratsalde.

Dena dela, Aramaioko lurjabeek erabaki dute ez dituztela aktak sinatuko; betiere, abokatuak bestelakoa esaten ez badute.

Hori bai, aktak sinatu edo ez, proiektuak aurrera egingo du eta lurren desjabetzeak ere bai; Madrillgo gobernuak Abiadura Handiko Trena interes orokorreko proiektu moduan izendatuta du eta.

Edozelan ere, lurjabeek aurkeztutako alegazioetako batean eskatu dute okupazio aktak bertan behera uztea; beraz, hori onartzen badu Sustapen Ministerioak, bertan behera geratuko litzateke datorren asteko hitzordua. Baina hori zail samarra izango da.

**ALEGAZIOEN NONDIK NORAKOAK: UDALA** Alegazioei dagokienez, Mertxe Mondragon alkateak eta Andres Osinaga zinegotziak laburtu dizkigute Udalarenak. Esan digute oro



Argazkiko neskatilak AHTren kontrako gutuna eta eskaera aurkeztu diote alkateari; Maitane, Miren, Eider, Itziar eta Maider dira.

har, Udalak trenaren proiektuaren gaineko informazio gehiago eskatu duela: ateratako lurak botatzeko zaborteak non egingo dituzten, herriko ibaiarengan zein eragin izango duten obrek... Baita ere, jakin nahi du zein kalte eragingo dien obrek herriko zenbait iturbururi eta zer gertatuko den lanak egiteko eraiki edo erabili beharko dituzten baserri-bideekin. Horrez

*Oraingoz, lurjabeek ez dituzte okupazio aktak sinatuko datorren martitzenean*

gainera, trenaren oinarriko proiektua ere eskatu dio Udalak Sustapen Ministerioari, eta baita ere alegazioak egiteko epea luza dezatela, berez, ez dutelako nahikoa asti izan.

Horrez gainera, jakinarazi digute Udala badabilela geologo batzuekin elkarlanean uren gaineko afekzioa zenbaterainokoa izango den ikusteko.

## Hasi besterik egin ez den ibilbidea:

Orain dela hiru urte egin zituzten lehenengo zundaketak, baina zenbait herritarrek ez zieten baimenik eman. Orain, falta zaizkien zundaketa horiek egin nahi ditu Madrillgo Sustapen Ministerioak, gero lanak egiten hasteko.

Aramaion, zortzi lurjabeek ukatu zuten baimena; orain, haien lursailak desjabetu nahi dituzte, zundaketak egiteko.

Aramaioko lurjabeek ez diete inolako

jakinarazpenik bidali Madrilldik. Baina, Aramaio Udalari esker, jakin dute euren zerrenda eta okupatu beharreko lursailena argitaratu dutela buletin ofizialean. Gainera, 15 eguneko epea eman zieten alegazioak egiteko eta jakinarazi diete datorren martitzenean etorriko direla okupazio aktak jasotzera. Justu eta larri, baina alegazioak egin dituzte lurjabeek. Orain, martitzenean zer gertatzen den ikusi behar.

Bestalde, alkateak gogorarazi digu Udalak 1999an ere egin zizkiola alegazioak AHTri.

### LURJABEEN ALEGAZIOAK

Lurjabeek dagokienez, lehen esandako moduan, 40 lagunetik gora sinatu dituzte alegazioak. Aramaioko lurjabeekin elkartu dira Eskoriatzakoak eta Arrasatekoak, indarrak batu eta guztiak alegazio berak aurkezteko. Gainera, oraingo desjabetze prozesuan sartuta dauden lurjabeek gainera, etorkizunean kaltetuta izan daitezkeen lurjabeek ere bat egin dute ekimenarekin. Aramaioaren kasuan, 12-13 bat herritarri eragingo die trenaren lanak.

Oraingoz, desjabetze prozesuaren gaineko eta bestelako lanen gaineko informazio zehatzagoa eskatu dute, batez ere, desjabetu beharreko lursailen planoak. Eta aurkeztutako alegazioak argitu artean, okupazio aktak bertan behera uztea ere eskatu dute.

### UMEEN EKIMEN BITXIA

Bestalde, AHTrekin lotuta, Aramaioko neska talde batek gutuna aurkeztu dio alkateari esanez ez dutela halako trenik nahi. 10-11 urteko neskatilak dira. Kontatu digute gurasoen bitartez izan dutela trenaren berri; proiektua ez zitzaizela bat ere gustatu eta trenaren kontra zerbait egitea pentsatu zutela. Hala, pankarta bat egin eta eskolan erakutsi zuten, ikaskide eta irakasleek egeeraren berri izan zezaten. Orain, berriz, idatzia bidali diote Udalari. Gainera, bi orri pasatxo sinadura batu dituzte idatzi horri babes emateko. "Ez dugu gure herrian trenik nahi, zergatik mendiak, landareak... apurtzen baititu, ez ditugu domeka on gehiago izango". Hori esan diote alkateari. Era berean, eskatu diote euren eskaera Lehendakariari helarazi diezaion. Mertxe Mondragonek, gutuna hartu eta umeekin batzarra egin du. Haien kezka ikusita, trenaren nondik norakoak esplikatu dizkie.

Hori ikusita, badirudi, Abiadura Handiko Trenak orain arteko bestelako proiektu batzuk baino kezka handiagoa piztu duela. Aramaion, behintzat.

## TELEFONOJAKINGARRIAK

### OSASUNA / LARRIALDIK

Osasun etxea (txandak)	945 44 53 40
Botika	945 44 50 03
Udaletxea	945 44 50 16
Ertzaintza (Arrasate)	943 79 71 99
Gurutze Gorria (Legutio)	945 45 52 52
San Martin Eskola	945 44 50 04
Taxia eta autobusak	945 44 50 33
Udal kiroldegia	945 44 53 35
Postetxea	945 44 50 83
Zuiaiko Eskualdea	945 43 01 67
Suhiltzaileak (Zubillaga)	943 78 28 00

## AUTOBUSORDUTEGIA

ARRASATE	ARAMAIO	GASTEIZ
07:00	07:15	08:00
10:00*	10:15	
11:00	11:15	
12:00*	12:15*	13:00
15:15	15:30	16:15
17:20	17:35	
18:30*	18:45	
20:30	20:45	21:25
21:00*	21:15	

  

GASTEIZ	ARAMAIO	ARRASATE
	07:50	08:05
08:15	09:00	09:15
	10:15*	10:30
	11:15	11:30
13:10	13:55	14:10
16:20	17:05	17:20
	17:35	17:50
	18:45*	19:00
19:30	20:00	20:15

**OHARRA:** izartxoan duten orduetan eskaeraren arabera zerbitzua eskaintzen dute. Auzoetako bizilagunei zuzendutakoa da, eta autobusa erabili gura badute, bezperan deltu beharko dute honako zenbaki honetara: 629 54 59 23

## OHARRAK

### DOMEKAN, ZINEMA

Jean-Jacques Annaud zuzendari frantsesaren *Dos Hermanos* filma aukeratu dute oraingo domekarako. Anaiak diren bi tigrenen gaineko filma da. Lehena, *El oso* filma egin zuen zuzendari berarena. Filma batean ohikoa den istorioa kontatzeaz gainera, dokumental itxura ere badu filma horrek. Umeen dako zein nagusiendako gomendagarria da. 17:00etan hasiko da saioa.

### ASTELEHENEAN, TURISMO

Astelehenean joango da KZguneko tutorea Aramaioa. Betiko moduan, goizez izango da, 09:00etatik 13:00ak arte. Gainera, 11:00etatik 13:00ak bitartean, *Asteburu bat Euskal Herrian* izeneko ikastaroa emango du.

### SANTA AGEDA, AUERRERATUTA

Ohiturari jarraituz, otsailaren 4an Santa Ageda ospatzeko eguna da. ospatzeko eguna da. aurten, baina, zapatua tokatzen da. Hori dela eta, San Martin Eskolatik abisatu digute hitzordua aurreratu eta barikuan ospatuko dutela egun hori.



Argazkian, Aramaioko oilategi bat; oraingoz ez dago kezkatzeko arrazoirik.

## Errolda eskuratu eta gero egingo dituzte analisiak

UBANE MADERA

**Joan den azaroan bidali zuten Arabako Foru Aldundiak hegaztien gripea dela eta Aramaion hartu beharreko neurrien gaineko dekretua. Haren arabera, herriko oilategien errolda egin beharra zegoen Aramaion; gero, zerrenda horren arabera analisiak egiten hasteko.**

Udaletik jakinarazi digutenez, dagoeneko batu dute herriko oilategien errolda hori. Eta esan digute laster bidaliko dutela zerrenda Foru Aldundira.

Diputazioko Nekazaritza Sailetik, berriz, jakinarazi digute azaroan hitzartutako protokolo horrekin aurrera egingo dutela; argitu digutenez, Eusko Jaurlaritzatik bideratutako protokoloa

da. Eta hona Europatik bideratuta iristen da.

Protokolo horren arabera, Aramaioko hegaztien gaineko errolda jaso bezain laster analisiak egiten hasiko dira.

Deña dela, horrekin batera jakinarazi digute, oraingoz, ez dutela gai horren gaineko bestelako informaziorik emango, herritarren artean alarma sorrazten duelako. Hala, bakarrik abisatuko dute analisisiren batean kasu positiboren bat atzematen badute.

Halaber, Diputazioko Nekazaritza Sailak kontatu digu Arabako zenbait gunetan dagoeneko egin dituztela analisi horiek eta oraindik ez dutela inolako arriskurik atzeman. Araban, batez ere, uretako hegaztiak eta baserrietako hegaztiak kontrolatzen dabilta.

## Aurrekontuak aztertuko dituzte datorren astean

UBANE MADERA

**Datorren eguaztenean, hilak 25, urtarrilari dagokion osoko bilkura egingo du udalbatzarrrak. Alkateak aurreratu digu bestelako gaien artean, aurrekontuak lantzeko asmoa dutela. Aurreratu digu, baita ere, diru gutxi duela Udalak eta lehentasunak zehazten dabilzala.**

Mertxe Mondragonek esan digunez, pentsatuta dute aurrekontuen gutxi gorabeherako banaketa zela egin. Hirigintzarako izan ezik, gainerako batzorde guz-

tiendako partidak zehaztuta dituzte. Hirigintzari dagokionez, sail horretan aurreikusi dituzte 2006rako inbertsiorik handienak. Eta, hain zuzen ere, inbertsio horiek aztertzen dabilta, lehentasunak zehazteko. Izan ere, alkateak esan digu, beste urtebetez, diru gutxi duela Udalak 2006an gastatzeko, eta beraz, ondo pentsatu beharko dutela diru horren banaketa. Hori guztiori landuko dute datorren astean. Alkateak esan digu akaso ezin izango dutela aurrekontu osoa landu, baina besterik ez bada, aurrerapentxo bat landuko dutela. Batzarra 18:00etan hasiko da.

## LABUR

### Alaiak elkarteak antolatutako mus txapelketan parte hartze handia izan zuten

Zapatuan, hilak 14, mus txapelketa jokatu zuten erretiratuen egoitzan. Txapelketa haren emaitzak helarazi dizkigute orain. Esandakoaren arabera, Ramon Altuna eta Angel Astondoak osatutako bikoteak irabazi zuten. Kopa eta urdaiazpikoa irabazi zituzten. Martin Arana eta Fermin Ibabe, berriz, izan ziren bigarrenak. Haien bakailaoa eta ardo botila irabazi zituzten. Eta hirugarren saria Kepa Mondragonek eta Jose Mari Ariasek irabazi zuten: gazta eta ardoa.

### Inauguratu dituzte Arexola auzoan egin dituzten berrikuntza lanak

Joan den barikuan, Herri Administrazioiko diputatu Isabel Fernandez de Castillo Arexolan izan zen, han egindako lanak inauguratzen. Zoladura lanak, sarrerako bidea handitu, elizako paretak konpondu eta argindar azpiegiturak lurperatu dituzte. Hori guztia erakusten izan ziren, besteak beste, Mertxe Mondragon alkatea eta Arexolako Agustin Arrizabalaga alkatea. 389.022 euro kostatu da guztia. Diputazioak 162.769 euro ordaindu ditu.



### Karidadeko Benta, Txirritola elkartearen eskutik

Datorren otsailaren 3an, barikua, Karidadeko Benta musika taldea Aramaion izango da, Txirritola Euskara Elkartearen ekimenez. 22:00etan izango da kontzertua, kultura etxean. Sarrerak egunean bertan erosi beharko dira, bost euroren truke. Karidadeko Benta osatzen dute Jon Maiak, Aran Santamariak, Inazio Tolosak, Jon Manzisidorrek, Imanol Manterolak eta Domentxu Uzinek. Maialen Lujanbio eta Xabier Amuriza bertsolariek ere kolaboratzen dute. Tradizio aitindaria eta aire berriak uztartzen ditu talde horrek, garaiko kopen ondoan hainbat kultura eta estilotako doinuak. / U.M.